

**Служба  
святomu праведному  
отцу нашему  
Алексию  
Бортсурманскому  
чудотворцу**

**(4 мая, 17 августа н.ст.)**

## НА ВЕЛИЦЕЙ ВЕЧЕРНЕ

На Господи, возвах: стихиры на 8, глас 8:

Зритель был еси умом мысленных Сил,/ яко детелен Божественных словес,/ полагая во твоём сердце,/ в немже и восхождения,/ яко лествицу утвердил еси,/ праведне, отче наш, Алексие,/ и ныне молися/ даровати душам нашим мир и велию милость.

Праведне, отче наш, Алексие,/ жизнь свою возложил еси Христу Богу нашему,/ вразумившему тя видением Ангела./ От Негоже укрепляем,/ плотские страсти помыслу повинул еси,/ худшее покоряя лучшему./ Темже молися/ даровати душам нашим мир и велию милость.

Богомудре отче наш Алексие,/ по слову Саровского чудотворца светильник явился еси великий,/ возсиявый чудес сияньми Божественными делы./ Темже по успении Незаходимый Свет тя прият./ И ныне молися/ даровати душам нашим мир и велию милость.

Приидите, празднолюбцы вси:/ соборную песнь воспоим бодренно:/ спасай нас от всяких искушений молитвами твоими/ и всякия скорби, праведне отче наш Алексие,/ почитающим тя моли даровати мир и велию милость.

Храм твой и рака мощей твоих/ врачевство подают душам и телесем,/ яко источник исцелений/ и бич бесовом прогонительный,/ и образ твой честный, Алексие, отче наш, праведне,/ печальным есть утешение.

Мира сего красоты прелестныя удалився/ и земного пристрастия,/ невещественное житие совершил еси/ и Бесплотным сочетался еси,/ с нимиже ныне пребывая,/ Алексие праведне отче наш,/ моли даровати душам нашим мир и велию милость.

Слава, глас тойже:

Праведне отче наш,/ трудом добродетели прилежно обучився,/ орган был еси Святаго Духа,/ от Негоже прием чудес действо,/ увещал еси человеки препобедити сладкая,/ Ныне же, Божественным светом чистейше осияваем,/ просвети и наши мысли, Алексие, отче наш.

И ныне, праздника или Богородичен:

Архангела Гавриила глас восприимше, рцем:/ радуйся, Мати Божия,/ Яже Жизнодавца Христа миру рождшая.

Вход. Прокимен дне. Чтения 3.

### **Пророчества Исаиина чтение (глава 13),**

Тако глаголет Господь: вси языцы собрашася вкупе, и соберутся князи от них. Кто возвестит сия в них? или яже от начала, кто слышана сотворит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз Свидетель, - глаголет Господь Бог, - и Отрок, Егоже избрах. Да познаете, и веруете Ми, и разумеете, яко Аз есмь: прежде Мене не бысть ин бог и по Мне не будет, Аз есмь Бог, и несть, разве Мене, спасаяй. Аз возвестих и спасох, уничижих и не бе в вас чуждий. Вы Мне свидетели, и Аз Господь Бог, и еще от начала Аз есмь, и несть от рук Моих избавляяй. Сотворю, и кто отвратит то? Сице глаголет Господь Бог, избавляяй вас Святыи Израилев.

### **Премудрости Соломоновы чтение (глава 3):**

Праведных души в руке Божией,/ и не прикоснется их мука./ Непщевани быша во очесех безумных умрети,/ и вменися озлобление исход их,/ и еже от нас шествие – сокрушение;/ они же суть в мире./ Ибо пред лицом человеческим аще и муку примут,/ упование их безсмертия исполнено./ И в мале наказани бывше,/ великими благодетельствовани будут,/ яко Бог искуси я/ и обрете их достойны Себе./ Яко злато в горниле, искуси их,/ и яко всеплодие жертвенное прият я./ И во время посещения их

возсияют,/ и яко искры по стеблию, потекут./ Судят языком и обладают людьми,/ и воцарится Господь в них во веки./ Надеющиеся Нань разумеют истину/ и вернии в любви пребудут Ему./ Яко благодать и милость в преподобных Его/ и посещение во избранных его.

### **Премудрости Соломоновы чтение (главы 5, 6):**

Праведницы во веки живут,/ и в Господе мзда их, и попечение их у Вышняго./ Сего ради примут Царствие благолепия и венец доброты от руки Господни,/ зане десницею покрывает я и мышцею защитит их./ Приимет всеоружие рвение свое и вооружит тварь в месть врагом./ Облечется в броня правды и возложит шлем – суд нелицемерен./ Приимет щит непобедимый – преподобие,/ поострит же напрасный гнев во оружие,/ споборет же с ним мир на бузумныя./ Пойдут праволучныя стрелы молниины,/ и, яко от благодругла лука облаков, на намерение полетят./ И от каменометные ярости исполнь падут грады./ Вознегодует на них вода морская,/ реки же потопят я нагло./ Сопротив станет им дух силы,/ и, яко вихор, развеет их,/ и опустошит всю землю беззаконие,/ и злодейство превратит престолы сильных./ Слышите убо, царие, и разумеите,/ навькнете, судии концов земли./ Внушите, держащие множества/ и гордящиеся о народах языков,/ яко дана есть от Господа держава вам, и сила от Вышняго.

### **На литии стихиры, глас 1:**

Безсмертию быв тезоименит,/ в вере твердей житие твое прошед,/ блаженнаго безсмертия причастник явился еси,/ праведне отче наш Алексие/ ныне Христови предстоя,/ поминай нас, почитающих тя.

Очистив от всякие скверны душу и тело,/ праведне отче наш Алексие,/ храм достоин Богу показался еси/ и Троицы жилище явился еси,/ чудотворче и молитвенниче о душах наших.

С Вышними лики яко Божий служитель предстоя,/ о нас прилежно молися,/ спасися душам нашим, праведне,/ молитвами твоими.

## **На стиховне стихиры, глас 8:**

Божиим смотрением призван был,/ иерею чудне,/ безкровные жертвы Богу принося,/ Пожержемуся нас ради,/ святой праведне отче наш Алексие.

**Стих: Праведник, яко финикс, процветет/ и яко кедр, иже в Ливане умножится.**

Не уподобился еси рабу,/ коснение господина своего наблюдающему,/ бдением же твоим выну готов был еси/ срести Господа своего,/ тем и Господь введе тя в радость нескончаемую.

**Стих: Блажен муж, бояйся Господа,/ в заповедях Его восхощет зело.**

Гроб, идеже пребывает честное тело твое,/ благовоние источает,/ яко рая Божия цвет,/ облагоухая верныя,/ святой праведне отче наш Алексие.

Слава, глас 8:

Христу явился еси угодник,/ праведне отче наш Алексие,/ не престай моляся ко Господу,/ да избавятся чтущие память твою/ от искушений, и бед, и скорбей.

И ныне праздника или Богородичен, глас тойже:

Дево Пречистая, спаси ны Матерними молитвами Твоими, взывая/ Сыну Твоему и Богу нашему.

## **На благословении хлебов тропарь, глас 4:**

**Петрово имый покаяние,/ безсребренником друг вчинился еси,/ Христово смирение приим в сердце,/ и нам Тому работати усердно заповедал еси,/ темже и мы радостне вопиим;/ спасай нас молитвами твоими,/ святой праведный отче наш Алексие.**

Ин тропарь, глас тойже:

Вознесе Господь бездну смирения твоего превыше небес/ и дарова нам имя твое во источник предивных чудес./ Темже во Христе во веки живой, чудотворче,/ молитвою спасая сущия в

бедах,/ слыши чада твоя,/ верою призывающих тя,/ Алексие праведне, возлюбленный пастырю наш.

## **НА УТРЕНИ**

На Бог Господь: тропарь праздника дважды. Слава: тропарь святого. И ныне: праздника.

### **По 1 стихословии седален, глас 4.**

Усердно днесь стекшеся, братие,/ духовный лик составим в честней памяти отца нашего Алексия,/ песни и благохваления тому соплетающе,/ благоговейно почтим духовныя подвиги его, победы и борения,/ имиже победы многокозненного врага/ и яко победоносец венчался еси светло от Христа Бога и Спаса душ наших.

Слава, и ныне, праздника или Богородичен, глас тойже:

Хвалу принесем, вернии, Матери Бога нашего/ и воззовем согласно,/ ангельски вопиюще к Ней:/ радуйся, Благодатная Дево, рождающая Спасение душ наших.

### **По 2 стихословии седален, глас 3:**

Светлое торжество совершающе днесь,/ воспоим Христа Избавителя нашего,/ хвалу Тому приносяще и взывающе:/ возвеличил еси, Христе, Твоего угодника,/ показав нам того чудес источник,/ источает бо от святого своего гроба исцелений струи/ верно притекающим и любовью чтущим того/ и Тебе, Спасе, славящим,/ славящая Тя прославляющего.

Слава, и ныне, праздника или Богородичен, глас тойже:

Ходатайства приими святого праведного отца нашего Алексия/ и молитву сотвори, Чистая, за нас к Богу.

### **Полиелей и величание:**

Величаем тя, святой праведный отче наш Алексие, и чтим святую память твою, ты бо молиши за нас Христа Бога нашего.



## По полиелеи седален, глас 4.

Удивил еси, Владыко Христе,/ показав нам во отце нашем такового молитвенника:/ той бо, яко солнце, лучи чудес испущая,/ осиявает верныя./ Тем же тому любезно воззовем:/ святой праведный отче наш Алексие,/ моли Христа Бога, грехов оставление даровати/ празднующим любовию честную память твою.

Слава, и ныне, праздника или Богородичен, глас тойже:

Богородице Приснодево,/ моли Сына Твоего/ грехов оставление даровати/ верою покланяющимся пресвятому Рождеству Твоему.

Степенна, 1-й антифон 4-го гласа. **Прокимен, глас 4: Священницы Твои облекутся в правду и преподобнии Твои возрадуются.** Стих: Помяни, Господи, Давида и всю кротость его. Евангелие от Луки, зачало 24.

По 50-м псалме стихира, глас 8:

Ангеле земный и друже человеков,/ органе Утешителя Духа,/ носителю любви Христовы,/ утешение печальных и скорбящих,/ молитвенниче святой праведный отче наш Алексие,/ прииди и стани с нами,/ да вознесем вкупе с тобой хвалу и благодарение Спасителю Богу нашему, /славное совершая сие торжество.

**Канон** праздника со ирмосом на 6  
и праведнаго на 8, егоже краестрочие:  
Праведнаго отца Алексия пою славу. Глас 4.

## Песнь 1

Ирмос: Моря чермную пучину / не влажными стопами/  
древний пешешествовав, Израиль / крестообразныма Моисеевыма  
рукама / Амаликову силу в пустыни победил есть.

Чувства моя и ум утверди, Спасителю Мой, да возмогу  
достойне

воспети молитвы и подвиги возлюбльшаго Тя и Тобою  
возлюбленного служителя Твоего, отца нашего Алексия.

От Господа видением Ангела вразумленный, путь хладный  
спасения ради оставил еси, светлостью Креста озаряемь, греховныя  
мглы избегл еси, Спасителю Богу молитвы и пения, вознося  
непрестанно, блаженне.

Якоже Илия колесницею огненною, тако и ты колесницею  
добродетелей на небо возшел еси. Отонудуже низпослати и нам  
жития исправление Господа умоли.

Богородичен: Жизнь вечную Тобою, Богородице Дево,  
прияхом, иже жизни райския некогда лишившийся, зане родила еси  
Единаго безначальнаго и вся оживотворяющаго.

Катавасия праздника.

### Песнь 3

Ирмос: Веселится о Тебе Церковь Твоя, Христе, зовущи: / Ты  
моя крепость, Господи, / и прибежище, и утверждение.

И нравом причастник и житием подражатель Ангелом быв,  
богодуховенне, слово Истины до конца исправил еси.

Зрительно Царствия Небеснаго бе душевное око твое, понеже  
чисто бысть, сего ради житие светле управил еси, еже чтуще о Бозе,  
тя прославляем.

Всяко изобилие благих тебе Христос даровав, верх  
Божественных дарований, отче праведне, показа тя, судом  
праведным, Богоявленне, Праведный Един.

Богородичен: Вся свет еси, Владычице, вся святыня, вся  
благодать, вся премудрость, вся можеша, яко Мати Всемогущаго,  
едина и та же всесовершенна, яко Мати Всесовершеннаго Царя  
славы.



## Седален, глас 8:

Плач мнозех о гресех к престолу Вышнему вознося, небес приклонение во святей Литургии духом созерцая, деяние и проповедание неразрывны имый, твоими делы и чудесы Саровскому чудотворцу сотаинник явился еси, Алексие блаженне, Нижегородския земли светильниче, молися о душах наших.

## Песнь 4

Ирмос: Вознесена Тя видевши Церковь на Кресте, / Солнце Праведное, / ста в чине своем, / достойно взывающи: / слава силе Твоей, Господи.

Основание твердо Христа имея, во страннолюбии Аврааму древнему уподобился еси, отовсюду к тебе приходящия приемля и Господу тех приводя, и тако угодная Богу творил еси.

Храм Богу сердце твое хотя устроить, в дому Божием непрестанно служить возжелел еси, украшая душу твою небесными добротами.

Росою подвигов твоих вся страсти телесныя угасив, возжегл еси просвещение безстрастия, темже и сын вечнаго дне явился еси, отче блаженне.

Богородичен: Иезекииль Божественный, Пречистая, врата заключенна пронарече Тя, имиже пройде неразтворенно, Единый Превечный, мир Свой нам подавая.

## Песнь 5

Ирмос: Ты, Господи, мой Свет, / в мир пришел еси, / Свет Святый, обращаай из мрачна неведения / верою воспевающия Тя.

Сподобился еси вышних дарований, отче, Господу твоему непрестанно служа и апостольския труды присно подражая.

Тленныя твоя плоти сладострастие умертвив, душу нетленную благочестием оживил еси и сию дом Духа Божественнаго сотворил еси.

Евангелие Христово всем усердно проповедуя, трапезы Господней причастник повседневный был еси, сам себе и паству твою, яко жертву живу и святу, Богови устрояя.

Богородичен: Единого от Троицы родила еси, Пречистая, милосердия ради на земли являшагося во двою естеству, Егоже непрестанно моли спасти души наша.

### **Песнь 6**

Ирмос: Пожру Ти со гласом хваления, Господи, / Церковь вопиет Ти, / от бесовския крове очищися / ради милости от ребр Твоих / истекшею Кровию.

Маслина плодovита в дому Господа Твоего был еси, Алексие блаженне, зане ведение Божественное Господь дарова ти и в делании праведнем укрепи тя.

Вещей студнаго явления отвратился еси, отче праведне, невеществен же Свет видети сподобился еси, Божества вид, приимшаго вещь человечества, блаженне Алексие.

Житие твое свято и слово твое, блаженне, благодати Божия исполнено, сердце твое молитвы благодатныя сосуд бысть, сего ради верою и любовию тя почитаем.

Богородичен: Естество Ангельское удивися еже в Тебе чуду неизреченному, Пресвятая Дево, како убо плоть восприят от Тебе, Иже безплотен Сый и вся содержаай.

### **Кондак, глас 4:**

**К пресвитерству усердному/ видением Ангела призванный,/ пастырь дивный Церкви Христовы явился еси,/ праведне отче наш Алексие./ Моли Христа Бога нашего,/**

**грехов оставление нам даровати/ и с тобою в Царствии Божием быти.**

**Икос:**

Дух Святый во пророцех глаголивый и Апостолы всю вселенную просветивый, мучеником крепости даровавый и чрез святители веру православную уяснивый, благодать Свою излиа обильно на тя отче Алексие, веру бо Христову словом, дела и всем житием твоим возвещал еси. Темже в селения Своя призва тя Господь, и ныне у Престола Славы Его предстоя, молися: всем чтущим тя с тобою в Царствии Божием быти.

### **Песнь 7**

Ирмос: В пещи Авраамстии отроцы персидстей, / любовию благочестия паче, / нежели пламенем, опаляеми взываху: / благословен еси в храме славы Твоя, Господи.

Промыслом Божиим свет благочестия явился еси отче Алексие, вся призывая вещати: Благословен еси в Церкви Славы Твоя, Господи.

Образ Божий человек есть, ты же, отче Алексие, зеркало Любве

Божией пресветло был еси и дом Святыя Троицы, Юже и мы грешнии прославляем.

Еже от Господа благодать приял еси, во еже недуги и страсти исцеляти человеком, тою и нас присно посещай, да вси с тобою единомудренно поем: благословен еси Господи Боже во веки.

Богородичен: Владычице, спаси род Твой, спаси единокровныя Твоя. Спаси ны, Мати Живота и всего рода человека, аще и недостойни есмы Тя Матерь себе нареци, освяти, утверди и спаси нас молитвами Твоими.

## Песнь 8

Ирмос: Руце распростер, Даниил / львов зияния в рове затче; /  
огненную же силу угасиша, / добродетелию препоясавшися, /  
благочестия рачители, отроцы, взывающе: / благословите, вся дела  
Господня, Господа.

Очисти сердца и мысли наша молитвами твоими и яко землю  
плодоносну покажи ны, да добродетелию препоясавшися, зовем:  
Благословите вся дела Господня Господа.

Венцем благодатных даров венчался еси, премудрость  
высшую созерцая и присно зовый: Благословите вся дела Господня  
Господа.

Троицен: Слава Тебе, Всесвятый Животворящий Душе, от  
Отца исходяй и в Сыне присно почиваяй, Слава Тебе, Сыне Божий,  
Святым Духом освящай, укрепляй и умудряй нас, Слава Тебе  
Отче, благоволяй о нас присно Духом Святым, нераздельная  
Троице Единице, помилуй нас.

Богородичен: Спасения всех Ходатаицу, являющуюся  
человеком и мир просвещшую сиянии боговидных чистоты, в  
песнях величаем.

## Песнь 9

Ирмос: Камень нерукосечный / от несекомых горы, Тебе,  
Дево, / креугольный отсечися, / Христос, совокупивый  
разстоящая естества. / Тем, веселящися, Тя, Богородице,  
величаем.

Воистину свет миру был еси, отче святой, божественными бо  
делами душу удобрив, пастырь изряден православных Церкви явился  
еси, всем верным образ быв словом и житием, сего ради тя  
ублажаем.

Единаго Содетеля, Имже и о Немже всяческая во всех, выну предзря пред умом, Тому чистым сердцем и неблазненною душею всем житием твоим поработал еси, яко Господу Своему, работою мамоне никакоже приразився.

Князи восхвалиша и народ мног прослави тя, ты же славу земную презрев, в вечных обителях Божиих возжелал еси быти и тамо прославляти Господа во веки.

Богородичен: Лестию древле благожребия праотцы изгна змий. Ты же сих, Мати Божия, возвала еси. Благословен, Пречистая, Плод чрева Твоего.

### **Светилен:**

В храме Царицы Небесная священнодействуя, от Господа глас чудный сподобился услышати еси: «Паси овцы Моя, паси избранные Моя, и внемли стаду Моему. Аз тя поставих над оным стадом горою святою Моею и стража Церкви». Темже слову сему внимая прилежно, праведене, не остави чтущия память твою.

Слава, и ныне, праздника.

### **На хвалитех стихиры, глас 8:**

Праведне отче наш Алексие,/ молитвами твоими уязвленным душам подавая исцеления,/ темже ты по долгу ублажаем/ и святое твоё днесь совершаем торжество./ Моли спастися душам нашим.

О чудес преизобилие!/ О любви живое облистание!/ Кто не подивится твоему благотворению/ и еже к убогим милосердию,/ Саровскому Чудотворцу неисчетностию чудес подобился еси./ темже и мы к любви твоей возопиим:/ Спасай нас молитвами твоими, отче наш.

Якоже свет и теплота/ солнца неразлучни/, тако и тебе святость и учительство,/ любви и милосердие присуще быша/, Алексие священнейший,/ людем Богодарованне. Темже, о

пастырю,/ буди согревая и просвещая нас,/ буди, якоже солнце,  
душам нашим.

Слава, глас тойже:

Оставив земная, Христу последовал еси/ и, знаменався  
дохновением Святаго Духа,/ праведне отче Алексие,/ и скончав  
подвиги Божественныя твоя страсти,/ Того моли, блаженне,/ даровати нам велию милость.

И ныне, праздника.

**На литургии:**

Прокимен, глас 4: Священницы Твои облекутся в правду, и  
преподобнии Твои возрадуются. Стих: Помяни Господи Давида и  
всю кротость его. Апостол: Послание к Евреям 311 зач., Евангелие  
от Матфея 11 зач. Аллилуия: Праведник яко финикс процветет и  
яко кедр иже в Ливане умножится. Стих: Насаждени в дому  
Господни во дворах Бога нашего процветут. Причастен: В память  
вечную:

**Молитва святому праведному Алексию Бортсурманскому**

Святый праведный отче наш Алексие, сохрани и соблюди нас  
молитвами твоими от искушений диавольских и падений  
греховных, испроси нам свыше помощь во время уныния и  
беспомощия нашего, да не преткнемся о камень соблазна, но  
неуклонно шествуем путем заповедей Христовых, дондеже  
достигнем оных блаженных обителей райских, идеже ты ныне  
водворяешься и веселишься. И яко предумершую душу отрока  
молитвою твоею воскресил еси, тако и душам нашим испроси у  
Господа к усердию воззвание, да избежавше молитвами твоими  
мытарств воздушных и власти лютаго миродержца, унаследуем  
Царство Небесное и прославим великолепое Имя Отца, и Сына, и  
Святаго Духа во веки веков. Аминь.